

M198: Vom Rechte

0,1 Nieman ist so here .
0,2 so daz reht z ware .
0,3 wan got ist ze ware .
0,4 ein rehtir rihtaere .
0,5 uon div hiez er den sinen chneht .
0,6 uil starche minnen daz reht .
0,7 daz er nach im uienge .
0,8 unde sin reht begienge .
0,9 wan mit im ne mach nieman gestan .
0,10 er ne welle daz reht han .
0,11 wan er scheidet die unrehten .
0,12 uon sin selbes chnehte- .
0,13 der reht sint uil manigiv .
0,14 unde besliezze-t alliv samet driv .
0,15 unde begiengen wir div .
0,16 wir mohten immir genuoch haben .
0,17 unde mohten mit allen eren leben .
0,18 Ein reht daz sint die trewe .
0,19 da wir mit schulen bovwen .
0,20 Ein andir reht daz ist also getan .
0,21 daz wir uns selben wellen haben .
0,22 daz solten wir einandir geben .
0,23 wolden wir christenlichen leben .
0,24 Wir solten sin gewaere .
0,25 daz waere michil ere .
0,26 der div driv reht behabet .
0,27 die wile daz er nv lebet .
0,28 unz an sinen tot .
0,29 dem hulfe got uon der not .
0,30 ez waere man oder wip .
0,31 er gaebe im den ewigen lip .
0,32 der da nimmir zergat .
0,33 unde immir ewich stat .
0,34 daz wir hier ze rehte wellen han .
0,35 der ist deheiniz so getan .
0,36 wir werfen eben alle .
0,37 swie uns geuallet .
0,38 mannichlich swie er wil .

0,39 des ist alles ze uil .
0,40 mannechlich sinen uriunde niht gestat .
0,41 als er in geminnet hat .
0,42 bi des iegelicher sinen muotwillen gechosot .
0,43 so stat daz reht uerbosot .
0,44 mannechlich wil reht han .
0,45 als sin gewalt ist getan .
0,46 unde wil daz im selbem haben .
0,47 und wil z deheinem anderen geben .
0,48 der site der sint drie .
0,49 da ist rehtes niht bi .
0,50 dar an wellent si gestan .
0,51 uon div wirt des armen rede uil unrehte getan .
0,52 die scheident ovch z ware .
0,53 uon dem rehten rihtaere .
0,54 wan swelhir den gewalt hat .
0,55 unde er daz unrehte begat .
0,56 unde er z ubir einen anderen dolot .
0,57 da mit hat uerscholot .
0,58 den ewigen lip .
0,59 ez si man oder wip .
0,60 er ne welle sich es buozzen .
0,61 unde welle ez gare uerlazzen .
0,62 daz er nimmir mere getuo .
0,63 daz reht horet dar zuo .
0,64 hat er sich uerwandelot .
0,65 so uerschivset ez got .
0,66 also mage er werden gotes chneht .
0,67 cheren abir an daz reht .
0,68 da uernement algeliche .
0,69 nieman ist so riche .
0,70 er muozze den richtuom uerlan .
0,71 unde muoz sin ane gestan .
0,72 swie der man daz geholot .
0,73 daz got daz uerdolot .
0,74 daz im sin richtuom zergat .
0,75 daz er sin niweht hat .
0,76 swedir daz uerbrinnet .
0,77 daz der man gewinnet .
0,78 oder er wirt berovbot . sin
0,79 richtuom so getovbot .
0,80 swedir ez uersinchet
0,81 in dem wazzir ertrinchit .
0,82 oder sus chumet ein unheil .
0,83 unde en leibet im sin deheinen teil .
0,84 oder in begriffet der tot .
0,85 so laet er ez danne durch got .
0,86 swenne ez got niht mere wil bewaren .

0,87 so laet er z noten uaren .
0,88 so gelovbet er alerste sinem chnehte .
0,89 so rihtet got rehte .
0,90 wan er uns nimet unde lat .
0,91 als er des gewalt hat .
0,92 beidiv lutzzil unde uil .
0,93 daz tuot er also diche so er wil .
0,94 unz ez also ergat .
0,95 daz der man niweht hat .
0,96 So hat der meister und der chneht .
0,97 bedesamt ein reht .
0,98 ich weiz si ensamet hin gant .
0,99 ein ruvtin bestant .
0,100 si rovtent mit den armen .
0,101 daz mohte uns wol erbarmen .
0,102 daz der riche man zergat .
0,103 daz er niht en hat .
0,104 daz sage ich iv wie daz stat .
0,105 daz der riche man zergat .
0,106 durch daz michil guot .
0,107 er cheret hohe sinen muot .
0,108 er furhtet niht den tot .
0,109 im erbarmet niemans not .
0,110 die ubirmuot er hin treit .
0,111 daz er si nidir nine leit .
0,112 unz an den tach .
0,113 daz danne chumet der gotesslach
0,114 so ist dehein burch so ueste .
0,115 geworht uzzir liste- .
0,116 si ne werde zerstorot .
0,117 gare zefuoret .
0,118 ez ist doch umbe den gotesslach so getan .
0,119 da ne mach niht uor gestan .
0,120 sich mugen die hohen movrin .
0,121 nindir da uor behuotin .
0,122 in deheiner ueste .
0,123 mit deheinem liste .
0,124 da cheren auir an daz reht .
0,125 da der meistir unde der chneht .
0,126 bedesamt hin gant .
0,127 unde die rovtin bestant .
0,128 die chleinen stoche . si ovz nement .
0,129 unz si an den grozzen choment .
0,130 des chraft ist also getan .
0,131 des muozzen si arbeit han .
0,132 wellent si des beginnen .
0,133 daz si in uz der erde bringen .
0,134 daz schulen si tuon mit ringen .

0,135 die dremele dr in stozen .
0,136 den herte- sweiz lazzen .
0,137 als ez umbe den herten man stat .
0,138 der daz unreht begat .
0,139 swer den wil becheren .
0,140 der muoz in rehte leren .
0,141 er muoz in starche dwingen .
0,142 an daz reht bringen .
0,143 also der rivtaere uil guot .
0,144 dem uil grozzen stoche tuot .
0,145 der in des dwinget .
0,146 daz er in uon der erde bringet .
0,147 wan lieze er in da stan .
0,148 so waere daz rovtin ungetan .
0,149 er bedorfte daz aerdisen .
0,150 nimmir dar gewisen .
0,151 daz isen dar in staeche .
0,152 den phluoch ez zebraeche .
0,153 also umbe den richen man stat .
0,154 der daz unreht begat .
0,155 den mach nieman bedwingen .
0,156 an dehein reht bringen .
0,157 ez ne tuo got der guote .
0,158 mit etlicher note .
0,159 oder ez auir etwie so chome .
0,160 daz er in uon der christenheit neme .
0,161 daz div christenheit geste .
0,162 daz si nine zerge .
0,163 Sa cheren . abir an daz reht .
0,164 da der meistir unde der chneht .
0,165 bedesamt hin gant .
0,166 unde die rovtin bestant .
0,167 so ez danne ze div wirt .
0,168 daz div rovtin gebirt .
0,169 si sulen ez fuoren samet heim .
0,170 teilen ez alliz enzwei .
0,171 wellent si rehte geuaren .
0,172 si schulen sich uil wol bewaren .
0,173 daz ir newederem werde mere .
0,174 wand si arnent ez bede sere .
0,175 si habent ez mit ir swaizze gewnnen .
0,176 ez bedarf ir enwedirz dem anderem enbunnen .
0,177 also getan leben .
0,178 solten wir allesamt haben .
0,179 swer ze genaden wil chomen .
0,180 der sol nieman niht nemen .
0,181 er sol ovch nieman nihts erbunnen .
0,182 des er mit rehte hat gewnnen .

0,183 so sol der herre unde der chneht .
0,184 minnen daz selbe reht .
0,185 wellent si rehte geuaren .
0,186 ieweder sol den anderen bewaren .
0,187 ubir alle sine not .
0,188 unz an sinen tot .
0,189 so lebent si bede rehte .
0,190 die herren unde die chnehte .
0,191 die urovwen ioch die divve .
0,192 die schulen haben triwe .
0,193 wedirz ist div vrovwe .
0,194 daz ist div triwe .
0,195 div gewarheit und ovch div triwe .
0,196 die gedahten einer diwe .
0,197 der herre an daz reht .
0,198 hiez do werden einen chneht .
0,199 er worhte in uzzir nihte .
0,200 er worhte z einem inerlichem liehte .
0,201 daz er uor im waere .
0,202 unde im licht baere .
0,203 do greif er an die ubirmuot
0,204 daz was ze niht guot .
0,205 der herre behielt daz reht .
0,206 do uerstiez er den chneht .
0,207 in ein ellende .
0,208 hin in daz apgrunde .
0,209 uon div so ne sol dehein urovwe .
0,210 gestatten ir diwe .
0,211 daz si sie uor lazze gan .
0,212 swie schone ir uarwe si getan .
0,213 noch der herre sinem chnehte .
0,214 daz chom uon dem rehte .
0,215 daz der allirherist chneht .
0,216 geuiel an daz unreht .
0,217 Vvil der herre unde der chneht .
0,218 bede minnen daz reht .
0,219 so sagent div buoch z ware .
0,220 si werdent ebenhere .
0,221 wil div urovwe und div diwe .
0,222 minnen die trivwe .
0,223 so sagent div buoch z ware .
0,224 si werdent ebenhere .
0,225 swie wol der man si geborn .
0,226 wil er unrehte uarn .
0,227 uert er unrehte .
0,228 er hat daz reht der chnehte .
0,229 ist div urovwe ungetriwe .
0,230 si hat daz reht der diuwe .

0,231 die schalche unde die diuwe
0,232 minnent si die triwe .
0,233 ir armuot sint nie so groz .
0,234 die werdent der heristen genoz .
0,235 swer da minnent daz reht .
0,236 ez si herre odir chneht .
0,237 der muoz ie hin fur gan .
0,238 der andir hindir im gestan .
0,239 Nieman ist so here .
0,240 so daz reht z ware .
0,241 des megen wir uns wol enstan .
0,242 swa wir ze rehte schulen gan .
0,243 swie harte sich der muoet .
0,244 der daz isen gluoet .
0,245 unde ez danne hin treit .
0,246 einem an die hant leit .
0,247 ist er rehte dar chomen .
0,248 daz han wir diche wol uernomen .
0,249 daz uivr in nine brennet .
0,250 wie wol in got erchennet .
0,251 wie uerre er da gelobet stat .
0,252 der daz reht da begat .
0,253 so sint si alle betrogen .
0,254 die in an habent gelogen .
0,255 swie ez dar nach geuare
0,256 so ist ir iegelichem gare .
0,257 ein isen also heiz .
0,258 daz ir neheiner weiz .
0,259 reht an die hant .
0,260 daz brennet als ein brant .
0,261 hei wie ez dem gluot .
0,262 der in unschuldigen muoet .
0,263 der in des bedwinget .
0,264 an daz reht bringet .
0,265 uon div sint die lugenaere .
0,266 got uil unmaere .
0,267 Swa div luge in dem dorfe gat .
0,268 daz ze dem urumen si bestat .
0,269 wil er minnen daz reht .
0,270 er heizzet swigen sinen chneht .
0,271 er heizzet swigen siniv chint .
0,272 unde alle die undir im sint .
0,273 er heizzet swigen sin wip .
0,274 unde gebivtet ir an den lip .
0,275 daz ez uerror nine chome .
0,276 daz ez iemaen uerneme .
0,277 Sint ovch div laster gewaere .
0,278 daz ist michil ere .

0,279 daz man da uon wente .
0,280 unde nieman schente .
0,281 swer redet grozze unde uromede schante .
0,282 daz sint unantlaezlich sunte .
0,283 Swie wol sich der man hat bewart .
0,284 da mit hat er erbart .
0,285 daz er im selben ein urchunde tuot .
0,286 daz er ne ist reht noch guot .
0,287 wan mohte sich mennischlich ersehen .
0,288 im waere etwaz geschehen .
0,289 der des rede wolde han .
0,290 daz uil ubile waere getan .
0,291 daz im uil liep waere .
0,292 daz man daz uerbaere .
0,293 daz man da uon wante .
0,294 unde nieman schante .
0,295 uon div sint die itwizzaere .
0,296 got uil unmaere .
0,297 Mannechlich sol hin gan .
0,298 sehen waz er selbe habe getan .
0,299 unde sol sich selbe des bewarn .
0,300 unde sol einen anderen uerbern .
0,301 er ne sag iz im durch guot .
0,302 gesach in got der ez tuot .
0,303 Nieman ist gotes chint .
0,304 wan die daz reht wrchunde sint .
0,305 die anderen sint uon den gesunderot .
0,306 uil ist des mich wnderot .
0,307 daz sich der hunt archman .
0,308 niht uerdenchen chan .
0,309 “div erge daz ist schante .
0,310 div ist lastir und sunte .”
0,311 swenne der arge man zergat .
0,312 daz er des libes nine hat .
0,313 so riwet in sin richtuom .
0,314 er ne hat den lon noch den ruom .
0,315 so stat er in der helle .
0,316 ez wndir waz der gotessun sin zuo der christenheit welle .
0,317 liez in einen heiden wesen .
0,318 er mohte alsam wol genesen .
0,319 wan unmaezzige erge .
0,320 ist gruntueste aller ubele .
0,321 Nieman ist so here .
0,322 so daz reht z ware .
0,323 der meistir ist guot .
0,324 der selbe guotiv werch tuot .
0,325 unde den chneht so mit heizzet uaren .
0,326 der wil den tumben bewaren .

0,327 wan der meister des immir lon hat .
0,328 swa der chneht daz reht begat .
0,329 wande er immir uor uert .
0,330 der die reise da burt .
0,331 unde man im daz lop git .
0,332 der bedenchet sich enzit .
0,333 daz er reht uor uare .
0,334 unde die menege beware .
0,335 swelhir so welle .
0,336 der uar hin ze helle .
0,337 heizze sin chnehte mit uarn .
0,338 da sint si alle mit uerlorn .
0,339 da habent si bede unreht .
0,340 beidiv meister unde chneht .
0,341 daz unreht ist daz leit .
0,342 ich zelle iv die warheit .
0,343 wande ez ungemaehlich enwech gat .
0,344 doch ez manich man hat .
0,345 Nieman ist so here .
0,346 so daz reht z ware .
0,347 wande sich got selbe uermaz .
0,348 do er in sinem wistuome saz .
0,349 da er selbe saz unde lerte .
0,350 die christenheit becherte .
0,351 swa zwene zesamene giengen .
0,352 unde an daz reht uiengen .
0,353 daz er der dritte wolde sin .
0,354 daz ist ein michil guotin .
0,355 samet in sitzzen unde stan .
0,356 unde daz reht began .
0,357 uon div sol der man unde daz wip .
0,358 sin als ein lip .
0,359 wande die dicke samet stant .
0,360 unde sizzent unde gant .
0,361 zwei samet en bette gant .
0,362 zwei an dem rehte gestant .
0,363 got mage uil wol sin .
0,364 undir ir beider dechin .
0,365 der dritte geselle .
0,366 swelhe so welle .
0,367 der widirrede daz .
0,368 der chan div buoch baz .
0,369 der iewedirz sol sin z ware .
0,370 des anderen sele chameraere .
0,371 als ez des rede wil han .
0,372 da si ze iungist schulen erstan .
0,373 Wande uns saget der gelovbe here unde staete .
0,374 der erfullet alle guotaete .

0,375 daz wir ze iungist schuln erstan .
0,376 mit dem bilede unde wir hivte hie schinich gan .
0,377 mit dem uleische unde mit dem gebeine .
0,378 alle gemeine .
0,379 div sele ist daz dritte reht .
0,380 also worht got sinen chneht .
0,381 nach sinem bilede getan .
0,382 unde hiez in sin reht han .
0,383 unde greif im an sinen lip .
0,384 unde hiez im werden ein wip .
0,385 uzzir einem sinem rippe .
0,386 also ist div werlt sippe .
0,387 daz wip chom uon dem man .
0,388 si schol im sin gehorsam .
0,389 si wart genomen uon sinem libe .
0,390 uon den schulden so gat der man noch nach dem wibe .
0,391 daz er si des bedwinge .
0,392 in sine gewalt bringe .
0,393 mit wiv sol er si twingen .
0,394 niwan mit rehten dingen .
0,395 mit rehtir gemaehelen .
0,396 so sol si sin chone sin .
0,397 er ist charl da si ist chone .
0,398 daz ist ein uil altiv gewone .
0,399 daz chint daz ist daz dritte reht .
0,400 also hiez got sinen chneht .
0,401 den wochir bringen .
0,402 daz chom uon alten dingen .
0,403 bovwen dise wuostin .
0,404 daz sol des mennischen reht noch sin .
0,405 daz erfullet werde .
0,406 der himil ioch div erde .
0,407 Iz ist reht daz der leie .
0,408 eine chonen aige .
0,409 unde er ir rehte mite uare .
0,410 unde ein andir uerbere .
0,411 ez ist reht daz daz iunge wip .
0,412 uil wol ziere den ir lip .
0,413 div sol einen man haben .
0,414 dem si ir urivnde wellen geben .
0,415 unde sol dem rehte mite uarn .
0,416 unde sol einen andern uerbern .
0,417 der ist der zweir meister .
0,418 daz sol sin der briestir .
0,419 der sol sin z ware .
0,420 ir uorletaere .
0,421 der meister sol wol gezogen sin .
0,422 er sol uil unbetrogen sin .

0,423 er sol sin durnachte .
0,424 gerne sol er weruen rehte .
0,425 daz ist div gotes ere .
0,426 daz er daz den chneht lere .
0,427 ist der meister iht betrogen .
0,428 so wirt der chneht ungezogen .
0,429 der uns da uor sol uaren .
0,430 der sol daz unreht uerberen .
0,431 daz der tumbe leige .
0,432 dar nach nine zeige .
0,433 so mage er mit gewalt .
0,434 daz chortir behalten .
0,435 Swa der abe cheret .
0,436 der die schuolaer leret .
0,437 so lernent unrehte .
0,438 alle die chnehte .
0,439 er sol rehte uor uaren .
0,440 also die guoten gemaren .
0,441 die rehte z achere wellet uaren .
0,442 er sol sinem gemaren gan .
0,443 als er z im selben hat getan .
0,444 mit einem rinde und mit einem chnehte .
0,445 daz horet zuo dem rehte .
0,446 daz im sin gemare .
0,447 also rehte mit uare .
0,448 so ne wirt der hagil noch der schovr .
0,449 niht ir nachgebovr .
0,450 swaz der man wil began .
0,451 da sol er reht zuo han .
0,452 swie geswaeslichen er ez tuot .
0,453 da ist daz reht uil guot .
0,454 wand ez ist got wol chunt
0,455 . e . wir geruoren den munt .
0,456 rehte weiz er in den muot .
0,457 ez si ubil oder guot .
0,458 uon div schulen wir uns bewaren .
0,459 daz wir uil rehte geuaren .
0,460 wan do got pileden began .
0,461 den allersten man .
0,462 nu sehet welich ein wndir da gescach .
0,463 daz er dem iungiste- undir div ovgen sach .
0,464 da mit hat er alle die ueruaren .
0,465 die wrden ode noch werdent geborn .
0,466 uon div weiz er mannechlichis list .
0,467 uil wol wie er getan ist .
0,468 han wir da heime ein uaz .
0,469 unde besliezzen wir daz .
0,470 wie mohte uns werden uerseit .

0,471 swaz wir dar in han geleit .
0,472 also stat ez umbe daz leben .
0,473 daz uns got hat gegeben .
0,474 wand er z dr in hat geleit .
0,475 uor im ist niht uerseit .
0,476 uor im ist niht uerborgen .
0,477 dar zuo horent sorge .
0,478 daz wir uns wol bewarn .
0,479 und uil rehte geuarn .
0,480 Wande mohten nu wir alle die eruarn .
0,481 die ie wrden geborn . [...] [...]
0,482 alle zesamene bringen .
0,483 die ne mohtin got nihtes bedwingen .
0,484 daz er da mit waere .
0,485 da man unrehte fuore .
0,486 Swie eine daz mennisch gestat .
0,487 da ez daz reht begat .
0,488 ez bedarf nieman lazzen sehen .
0,489 ez hat einen guoten nachgehen .
0,490 got selbe da stat .
0,491 da ez daz reht begat .
0,492 er ez horet er ez sihet .
0,493 er es immir nach gihet .
0,494 er sterchet ez dar zuo .
0,495 daz ez daz reht getuo .
0,496 uon div so schulen wir uns bewarn .
0,497 daz wir uil rehte geuarn .
0,498 der ist des rehtes meister .
0,499 daz sol sin der briestir .
0,500 der ist unser liehtuaz .
0,501 der bezeichint daz .
0,502 daz er uor uns sol sin .
0,503 mit aller slahte guotin .
0,504 er sol uns leren . unde sagen .
0,505 den rehten spiegil uor tragen .
0,506 er sol uns leren .
0,507 wie wir unsir gewaete cheren .
0,508 innen uon den sunten .
0,509 ovzzen uon den schanten .
0,510 wil er briesterlichen leben .
0,511 er sol driv reht haben .
0,512 einez ist div guotin .
0,513 daz andir div diemuotin .
0,514 daz dritte ist div minne .
0,515 so wiruet er mit sinnen .
0,516 Ez ist reht daz leige .
0,517 den selben sit aige .
0,518 so im der briestir uor trage .

0,519 daz er im uil rehte nach trage .
0,520 so mugen si bedesamt gan .
0,521 hin fur den himil chunich stan .
0,522 der leige unde der briester .
0,523 got der ist ir meister .
0,524 der reht sint noch driv .
0,525 durch not erliden wir div .
0,526 undanches ode danches .
0,527 dar an ist niht wanchis .
0,528 wir wrden eines geborn .
0,529 wir muozzen andirstu-t ueruaren .
0,530 wir muozzen dritten stunt erstan .
0,531 daz ist rehte getan .
0,532 gesach got den man .
0,533 der sich des uerdenchen chan .
0,534 wie uerre er da gelobet stat .
0,535 der daz reht begat .
0,536 in lobet der himilherre
0,537 selbe uil uerre .
0,538 er heizzet si elliv siniv chint .
0,539 die daz reht wrchunde sint .
0,540 er heizzet si uaren geliche .
0,541 ze sines uater riche .
0,542 gewihet ioch gesegenot .
0,543 da ne furhte-t si den tot .
0,544 da uindent si ewechlich lieht .
0,545 da ne wirret in niht .
0,546 dar muozzen wir allesamt chomen .
0,547 die die tovvfe habent genomen .
0,548 wand wir uon dem rehte chwamen .
0,549 nu sprechet alle "AMen ."